

ԹՈՒԳՈՄ ԱՐՔԵՊԻՍԿՈՊՈՍ ԳՈՒՅԱԿԵԱՆ

ՀԱԶԱՐՏՈՂԵԱԿ * * *
* * * ՓՈՐԱԳՐՈՒԹԻՒՆ



ՄԽԻԹԱՐԵԱՆ ՑՊԱՐԱՆ

ՎԵՆԵՏԻԿ - Ս. ՂԱԶԱՐ

1939

891. 99
թ-81

19 NOV 2011

ՀԱՅԱՍՏԱՆԵԱԿ
ՓՈՐԱԳՐՈՒԹԻՒՆ

891.99
P-81

ԹՈՐԳՈՄ ԱՐՔԵՊԻՍԿՈՊՈՍ ԳՈՒՇԱԿԵԱՆ

ՀԱՅԱՐՏՈՂ ԵԱԿ * * *
* * * ՓՈՐԱԳՐՈՒԹԻՒՆ



ՄԻՒԹԱՐԵԱՆ ՏՊԱՐԱՆ

ՎԵՆԵՏԻԿ - Ս. ՂԱԶԱՐ


1939

70 8222

22.04.2013

31571

65568-67



Յ Ա Ռ Ա Զ Ա Բ Ա Ն

«Հազարտողեակ փորագրութիւն»ը ընտանի եւ գուարք նկարագիր մ'կ Գահիբէի մօս Մարտիս թնակող Տիար Յակոբ Յակոբեանի տանը, ուր հիւրընկալուած ատենօֆ Թորգոմ Պատրիարք, նոյն ատեն Առաջնորդ Եղիպտոսի, Եռամսեայ ապաքինման օրերուն ուզած է երգել իր շուրջը տեսածը, եւ զրի առնել անկեղծ սրտին քրքումը:

Ամբողջ երգը կը կազմուի հազար տողերէ, այս պատճառաւ ալ Գերապատի Սրբազնը ուզած է զայն անուանել «Հազարտողեակ», եւ որովհետեւ անկողնին վրայ երկարա՛ծ գրել ստիպուած է իր ժերպուածը, «փորագրութիւն» կոչած է, իմացնելու համար թէ սեղանի վրայ յենով չէ որ տողած է մանր եւ յստակ գրութեամբ կազմուած այս հատորիկը՝ որ աւանդ մ'կը քանիկագին, նուիրուած Յակոբեան ընտանիքին, հրատարակուելիք մի միայն իր մահէն վերջ :

Հանոյնով եւ գոհութեամբ զայն թղթատելէ վերջ, 1939ի Զատկին, երբ Աղեքսանդրիոյ մեր Վարժարանի «Արի»ներուն հետ, այս երկրորդ տարին ըլլալով կը հիւրասիրուէի Յակոբեաններէ, առաջարկըն ընդունեցայ Ս. Ղազարու տպարանին մէջ զայն ի լոյս ընծայելու, ազգասէր եւ գիտուն Պատրիարքին ազնիւ զգացումներուն հաղորդ ընելու համար բոլոր ընթերցողները :

«Հազարտողեակ»ին կը կցուին երկու «նամակ»ներ, նոյնպէս տասնունեան տողերով, շատ աւելի մտերմիկ ոնով. եւ Թորգոմ Սրբազն ամբողջ այս ժերպութեանց մէջ, խօսելով թնակարանին եւ անոր թնակիչներուն վրայ, իբրեւ հայր մը կ'ուզէ իր զաւակներուն հետ գրուցատրել ժպիտով մը եւ ընտանութեամբ, ինչպէս որ սովոր էր խօսակցի Յակոբեան ընտանիքին հետ, ամէն անգամ որ անոնցմէ հրաւիրուելով՝ մօսերնին կը հանէր մնալ :



Հնիքերցողին աւելի հասկնալի դարձնելու համար նկարագրուած տունը, նոյն ժամանակները ափյափոյ բաշուած մէկ բանի լուսանկարները հրատարակութեան կցել աւելորդ չտեսնուեցաւ. լուսանկարներ՝ որոնք եթէ փափառուածին չափ պայծառ եւ յաջող չեն, պատճառը օր մը հրատարակուելու կանխագուշակութիւնը իրենց պակսի՛ն էր անշուշտ :


Հիւանդութեան շրջանի մէջ մէկ շունչով գրուած այս հազար տողերուն եւ երկու նամակներուն մէջ ընթերցողը պիտի չկնտուէ ապահով՝ ո՞չ իմաստասիրական բարձր խորհրդածութիւններ ոչ ալ նիւթէն դուրս բանաստեղծական սլացքներ : Սրբազնին նպատակն էր հանելի անակնելալ մ'ընել զինքը սիրող եւ պաշտող Յակոբեան ընտանիքին . ըստ այնու սրտին այս զգացումէն առաջնորդուած տողած է իր ֆերրուածը, իբր Ղունկիանոս մը, որ ձեւէն աւելի նիւթին ուշադիր, զոհած է երբեմն արտաքին շուրջն ու արուեստը :


Հանգուց . Սրբազնին վերջին կենդանագիրներէն մին է ֆերրուածին սկիզբը զարդարող իր պատկերը . զգալի է տարբերութիւնը Եգիպտոսի Առաջնորդին եւ Երուսաղէմի Պատրիարքին . տարիները, եւ աննցմէ աւելի տառապանքները գծած են լայն նակարին վրայ խոր ակօսներ եւ հեզ նայուածքին մէջ կսկիծ մը . Եգիպտոս իր ընծայած վերջին արժանաւոր ընդունելութեամբ զանաց մոռցընել անցեալ վշտերը . իսկ Յակոբեան ընտանիքը անսպառ մխիթարանքը վայելեց անգամ մ'ալ ; իբր Պատրիարք, ընդունիլ իր յարկին ներքեւ անկեղծ բարեկամը, որ մեկնած պահուն կը խոստանար «Հազարտողեակ»ին երկրորդ հատորիկը պատրաստել :

Հ. ՔԵՐՈՎԻՔ Ա. ԶՐԱՔԵԱՆ

Տեսուչ

Աղեքսանդրիոյ Միտթարեան Վարժարանին





Հիւսիս - Արեւմուտքը ա'յն Աւանին,
Զոր հընախօսները կը դաւանին՝
Հելիոպոլիսն Հին - Եգիպտոսի,
- Եւ որ, բարբառով արաբախօսի,
Արդ Մաթարիս կը կոչեն մարդիկ -
Տուն մը կը կանգնի, ճամբուն ճիշտ մօտիկ.
Պալատ մը չէ ան, դըղեակ չէ անի,
Այլ բընակարան մը երկյարկանի,
Որու գեղաշուք՝ պարզ բայց աչքառու
Տեսքը չես ըզգար բնաւ սըրտէդ հեռու:

* * *

Յածուկ պարիսպով, վրան թելէ վանդակ,
Պատ մը կը դառնայ շուրջը բովանդակ.
Շըրջապատին մէջ կայ պարտէզ՝ այգի,
Բուրաստան սիրուն, ծաղկունք բազմազգի
Ածուներ գողտրիկ, մարդ դաւարազուարթ,
Յասմիկ եւ շուշան, մեխակ, սոխակ, վարդ:

Անդին բանջարնոց մ'ուր սոխն ու սըմբուկ,
Լոլիկը, լուբիան եւ փըրփեմ փափուկ,
Եգիպտացորեն, մուլուխիէն բընիկ,
Մէկն անկիրթ Փէլլահ, միւսն իր խեղճ կընիկ,
Վախով կը դիտեն ամպը սեւ մուխին,
Որ ծըխնելոյզէն վեր կ'ելնէ լըռին:

* * *

Սարփինային վրայ պըլլըւած՝ պասկած,
Սաղարթքնին փըռած իրրեւ զառիգած,
Տես՝ ինչ խայտանքով տունկերը որթի,
Որոնց մէջ նոյի ոգին կը յորդի,
Պարտէզին շուրջը կարծես կը պարեն,
- Խեղճե՛ր, արդեօք մեր հալէն խապա՞ր են -
Անոնցմէ ոմանք, գինովցած լոլիկ,
Արտաշեղումով մը խընդամոլիկ,
Իրենց կարգէն դուրս ելած, պարտէզէն
Տեսէ՛ք տեսէ՛ք ի՞նչպէս ներս կը վագեն:
Կարծես թէ իրենց խօլ զըւարձանքին
Համա՞ր կը տափէ, զերդ թըմբուկ ուժգին,
Մըխոց մ'որ երկրի ծոցէն խոր եւ խուլ
Արթեսեան ալիք կը հանէ անդուլ:
Ու որթ մը խելառ, հրապուրած անոր
Զայնէն, կը մաղլէ, ոյժովն իր բոլոր,
Վեր աշտարակէն՝ այն երկաթակուռ,
Որուն ծայրը կայ ջրամբար մը մաքուր:
Զո՞ւր խըմել կ'երթաս, ո՛րթ սիրելի, հոն,
Թէ գինի շինել, ըսէ՛ ինծի, օ՛ն:



Ո՛չ, ո՛չ, չենք ուղեր որ օր մը մարդիկ
շոտ, վերը, գլունեն տակառ մը կամ տիկ.
Չենք ուղեր որ ետ դառնան այն դարեր,
Ուր հրաշքը ջուրէն գինի կը հանէր:

* * *

Բայց անցնինք մեր միւս ծառերուն անթիւ
Որ այդ այդին փառքն են եւ պատիւ:

Պէտք է նախ յիշեմ լունկաբոյր մանկան,
Գէր՝ անուշահամ միրզն այս Հընդկական,
Որուն անունովն հաճոյք եղաւ մեզ
Կոչել օր մայդին այս մանկապարտէզ.
Եւ այս պատճառաւ սահմանել անոր
Տեսուչ՝ տեսչուհի, պաշտօնեաներ նոր:

Յետոյ, էշտան քաղցր, Հընդկաստանի միւս
Պլասուղն այս, որ մէջն ունի սերի խիւս.

Մատակասկարեան միրզն ապա քընքուշ.
Մօղը, հէլուայէ տօլման այս անոյշ,
Որ լայնատերեւ իր հովանոցին
Տակ կը դիմադրէ արեւին բոցին:

Կայ նաեւ պարկուկը ծիրանազգի,
Որուն բեռան տակ գետին կը հակի
Ծառն համեստագեղ, մայր՝ որ իր որդւոց
Սիրով կ'ըսփոփէ իր ոըլտիկը խոց:

Քովը, մեր սալորը, միրդ հատընտիր,
Զոր բոլոր աշխարհ ճանչնայ անխըստիր:

Քիչ մ'անդին, դեղձին, բարեխառն օդի
Ծառն այս աղուոր, ի՞նչ անոյշ կը հոտի:

Աւելի հեռուն, մուշմուլան փոթոթ,
Հինդեղին այս թընամին տըտպոտ:
Տեղ մը, իր կարգին, յունապենին սէգ,
«Կարծես ձիթենի մը» պիտի ըսէք.
Զեւով պըտուղին իր մանրամարմին,
Պարծանք ծառերու ափրիկեան զարմին:

Թըզենի մ'ալ կայ, բայց դեռաբողբոջ
Երեք ծիլ միայն, երեք ձագ դողդոջ,
Որ մայրենի հին կոճղի մ'ըստինքին
Կաթը կը ծըծեն փարումով ուժդին:

Անկիւն մ'է քաշուած սերկեւի մ'անոյժ
Որ իր կեցուածքով ամօթղած ըզդոյշ,
Կարծես թէ կ'ըսէ, «իմ տեղըս չէ հոս.
Զի կըրնար ինծի սընունդ տալ նեղոս»:

Դեռ նարընջենին ու կիտրոնենին
Այս տեղ յիշուելու իրաւունք չունին.
Թէեւ բազմաթիւ, բայց յոյժ նորատունկ,
Հաղիւ դեռ ծաղիկ ունին եւ բուրմունք.
Սակայն իրենք են - չունիմ տարակոյս -
Այս պարտէզին փառքն ու ապառի յոյս -:



Անանաս մ'ալ կայ, ըսին. չը տեսայ,
Բայց Սէյլանէն ե՞րբ հոս եկեր էսա.
Կ'իմանամ իրմէ, օրին մէկն երբ նա
Պընակի ոտքով ինձ ներկայանայ:


Ցանկապատէն դուրս, տունէն քայլ մ'անդին,
կայ արմաւենի մ'առոյգ, որ դուռին
Դիմացը կանգուն, շիք ոստիկանի
Կացքով, պահնորդի ճիշտ կը նըմանի:

Վերջացան ծառերն. բայց չը յիշեցի
Դեռ ազնըւական ծառն այն որ ինծի
Ինկած է բաժին. թէ ի՞նչպէս՝ չըսեմ.
Զեւով՝ պլատուղով՝ անունով վըսեմ,
Պատուիրակն է ան հոս Հընդկաց երկրին.
Իր համշիրակներն հոս իրմով՝ բերկրին,
Այս պարտէզին մէջ. իրենց քուրմ՝ դենպետ
Նըկատելով զայն, մանուկն ահափետ
Կ'ըլլայ երբ նայուածքն անոր հանդիպի.
Բայց խորհողն խկոյն. «ի՞նչ աղուոր տիպի
Տունկ մ'է այս ազնիւ», կ'ըսէ ինքնիրեն.
Անունն է Փափաս, այդպէս կոչեր են
Քրիստոնեայք զայն հոս, հոգեւորական
Շուք մը տեսնելով կարծես թէ վըրան:
Իրօք Բունքուի, հընդիկ քուրմի, նուրբ
Մարմին մ'ունի ան. որ, սլացքովն իր սուրբ,
Երկրէն խուսափուկ, երկինք կը նայի,
Իր համար աշխարհ տեղ մ'է ամայի:
Երկրնքի կարծես թէ քաղաքացի,
Տուած է այս կեանքին յաւերժ աքացի:

Գագաթին վըրայ տերեւներ ցըրիւ
կու տան իրեն գլուխ մը գիսախըռիւ.
Ու պըտուղներու - սեխազգի կլորակ -
Խիտ խումք մը կզակին՝ մօրուք բոլորակ:
Հոն կեցած այսպէս երկար հասակաւ,
Քարոզ տայ կարծես ժամեր ոչ սակաւ.
Թէ ունայնութիւն է կեանք - Նիրվանայ -
Ուր հոգին մեղքին մէջ կը խըռուանայ:

Ի՞նք քարոզիչ, ի՞նք նաեւ գաւազան
Յոյց կու տայ մեղի հոգւոյն աւազան:
Քա՛ղցր է իր ազդումն, ինչպէս պըտուղներն.
Իր քով կը թօթուէ մարդ մեղքերուն բեռն:
Եւ ինչպէս մարսիչ է հոյզն իր միրգին,
Նոյնպէս կազդուրող խորհուրդը տեսքին:
Աշխարհիկ դասէն ոչ ոք, կին կամ այր,
Պէտք չէ մօտն երթայ, դիտէ զայն վեր վայր.
Ղեւտացւոց ցեղի կը պատկանի ան,
Իր տէրն է մի միայն հոգեւորական.
Այն ալ՝ ամուրի, եւ յիսունը անց,
Պէտք է միշտ լինի մի փորձառու անձ:
Ահա՛ թէ ինչո՞ւ ես զայն ինձ բաժին
Սեփականեցի, ոսկրէն մինչ կաշին:

Պատուէ՛ր ձեզ, ըզգո՛յշ չը համարձակիք,
Ըզբաղիլ իրմով, մարդիկ, կընկըտիք:
Միայն Տրդատեան Առաքելիկին,
Որուն մեր Նըւարդն է ազնիւ տիկին,
Կը յանձնեմ պաշտօն քարտուղարութեան,



Որ յորդւոց յորդի, այժմ եւ յաւիտեան,
Հաշուէ, իմ կողմէ, պըտուղներն անոր,
Գլրէ քաղուածը եւ ծնածները նոր.
Եւ այս վաստակին առատ փոխարէն
Վարձք - ոչ իրաւունք - տասանորդ մ'իրեն:

* * *

Եկէ՞ք արդ երթանք շրջիւ պարտէզը·
Մի՛ վախնաք չ'անցնիր ոտքերնիդ սէզը:

Կը տեսնէ՞ք բիւրեղ սա պալատն աղուոր,
Զոր շալակն առած է փիղ մ'ահաւոր,
Որ չ'ունի գլուխ՝ պոչ, եւ է աններբան,
Տեսնողը կ'ըսէ. «Զարմանալի՛ բան»:
Անոր մէջ կ'ապրին ձուկներ տասներեք.
Ամուլ թիւ. ինքնին կը մըտաբերէք
Թէ վատ բան մը կայ այս տան մէջ պայծառ,
Ընտանիքն անոր է կարծես չոր ծառ:
Չեն աճիր, չ'ունին հարսնիք՝ նըշանտուք,
Չ'ունին զուարճութիւն, կերուխում, խնտուք.
Սա մօտի ջրային քաղքէն գաղթական՝
Տարիներ առաջ անոնք հոս եկան.
Ու մնացին այսպէս անկէց ի վեր հոս,
Կեանք մը ապրելով անաղմուկ անխօս:

Կ'ըսեն ոմանք թէ վանականներ են,
Որոնք խոյս տըւած կեանքի հոգերէն,
Արեւուն լոյսին տակ եւ ամէնուն

Աչքին առջեւ, հոս, կ'ողբան օրն ի բուն,
Պոչերովնին ջուրը ծեծելով միշտ,
Կուլ տալով իրենց հառաջանքն ու վիշտ:


Սակայն նայելով այլոց ալ կարծեաց
Աքսորական են անոնք, հոս քըշուած,
Որ այսպէս իրենց հոգւոյն փրկանքին
Հոս կը վըճարեն ահա տոյժն ու դին:
Ո՛ըն ալ է ըստոյդ երկու կարծիքէն,
- Բերդ կամ վանք, երկուքն ինձ համար մէկ են -
Մաղթենք իրենց մենք համբերութիւն լայն,
Կեանքերնին չ'անցնի թող ի սպառ ունայն:

* * *

Երթանք արդ տեսնել միւս քաղաքն այն մեծ,
Ուր չըկայ լոռութիւն կամ ողբ դառնահեծ.
Եւ ուր, ինչպէս հոս, մեզ՝ մըթնոլորտը,
Կեանքի կայանն է ջրեղէն ոլորտը:

Տե՛ս բարձրապարիսպ սա շրջանակը,
Որուն մէթը ու կէս խորունկ է տակը.

Կարմրագոյն ձուկեր, լեցուն՝ անոր մէջ,
Անդառար կ'ընեն զըւարթ ելեւէջ:
Կը կայտեն վեր վար. իրենցն է կեանքը.
Անոնց համար քէյֆ է աշխատանքը.
Կ'ածեն, կը ձագտեն, կ'ածին անդադար,
Ու երբ բազմանան՝ կը սպաննեն զիրար.



Այս տե՛ղ ալ նոյն է օրէնքը կեանքին.
Պատերազմ. կիրքերն հո՛ս ալ կը բռնկին:

Աւազանին մէջը կայ խաղաղիկ
- ինչպէս բռւստէ մեծ եւ լայն մի ծաղիկ -
կղզի մը խոշոր. անոր լանջքերուն
վրայ սրփութած են դալարիք սիրուն.
Որուն՝ ջուրին մէջ ցոլացիկ չուքին
կը կառչին ձուկերն երբեմն անձկագին.
Եւ յուսախար՝ ետ կը փախչին կամ վար,
Պահուըտիլ ջուրին տակ ամօթահար:

Եթէ հացի փշուր կամ շիւղ մը խոտի
Նետես աւազանը, կը փըրփըրոտի
Յանկարծ քաղցերնին. կը խուժեն սաստիկ
Թափով անոնց վրայ, ու բըզիկ բըզիկ
Կ'ընեն իրարմէ խըլելով զանի.
Եւ խաղաղութիւնը աւազանի
կը խոռվէ հոս ալ խուլ խըղուըրտիւնը
Հացի կուրին, ինչպէս մեր՝ ձեր տունը:

Երբեմըն կու դայ պարտէզին շունը,
Դեռ նոր թօթափած ցերեկի քունը,
Զուր խըմել. երկու թաթերովն ելած
Եզերին վըրայ: Երբ բերանէն բաց,
Իրբեւ ահարկու եւ լայն մի հնոցէ,
Կախուած լեզուն օդը կ'ալեկոծէ,
Եղկելի ձուկերն ի՞նչպէս կու տան խոյս,
Լեղապատառ, լուռ, ահարեկ, անյոյս:


Բայց երբ ճշնձղուկները, թըռչըտելով,
Տաք օդէն, կու գան, կղզեկին վրայ զով,
Հանգչիլ կամ ճրւճւալ իրենց երգն անոյշ,
Ի՞նչպէս կ'ելնեն վեր, եւ կեցած ըզդոյշ,
Կը թուին ունկընդրել եւ կամ դիտել լուռ:

Ահա տատրակներ զոյգ, մաքրամաքուր,
Կը սիրուըտին հոն, եւ հայելոյն մէջ
Փետուրներուն շողքը փողփողենէջ
Կը դիտեն մեղմիւ: Ի՞նչպէս ձուկերն այն,
Անշարժացած հոն, վայրկեաններ երկայն
Կը նային անոնց, ջինջ ըզմայլանքի
Զիդ բերումներով, ազնիւ, կաթոգի:

Ա՛խ, կեցէք այնտեղ, տատրակներ անմեղ,
Ի՞նչպէս սիրուն էք դուք եւ շնորհագեղ.
Ե՞րբ մարդուն աչքերն՝ հարս մ'եւ իր փեսան
Զեզի չափ ամբիծ եւ ըզգաստ տեսան.
Որո՞ւն հագուածքն ա'յնքան պարկեշտաշուք
Է որքան այն զոր ահա ունիք դուք:
Ո՞ւր գոյներն իրենց երգն ու երանգը
Խառնեցին այնպէս դաշն՝ ինչպէս ցանքը
Զեզ գեղազարդող այնքան շողերուն,
Շիջելամերձ՝ վառ՝ մարած կամ պըսպղուն:

* * *

Պարտէզը ունի պահակներ երկու,
Ո'չ շատ սիրուն ո'չ աւ շատ ահարկու



Կերպարանքով զոյտ մը եղիպտացի,
Զորս հոս բերած է կարիքը հացի:

Երկուքն ալ մըշակ են, եւ նոյն ատեն
Կը բրեն, կ'ոռոգեն, կ'աղբեն, կը յատեն:

Հագած պարեգօտ մը, տիմի կապոյտ,
Գլուխնին թեթեւ լաթ մը փաթթած անփոյթ,
Հոլանի օձիք, թեզանիքներ կախ,
Բոկոտն, ի'նչպէս կ'ոստոստեն աջ ու ձախ:

Մէկուն աչքէն մուխ մը կ'ելնէ կարծես,
Բոլորովին չէ միւսինն անոր պէս.
Ան երբ խօսի հետըդ, կը նայի վար.
Ասոր աչքն աչքիդ շուրջը դառնայ յար:

Հասակնին՝ շիտակ. սիրտերնին՝ չ'իտեմ.
Իրենց վրայ ես սա՛ միշտ կը նըկատեմ,
Որ ճիգ կ'ընեն շատ՝ գոհ երեւելու,
Իրը ըստոյդ ծառայ, բախտերնուն հըլու:

* * *


Սակայն պարտէզին, ինչպէս նաեւ տան,
Բուն պահապաններն են եւ ոստիկան,
Զորս շուն, մեծ ու փոքր, ըսպիտակ, սեւ, գորչ:

Սեւն՝ անունը Պլէք, ունի որջն իր խորշ.
Ուր կը մնայ փակուած մինչեւ գիշերը:



Կատաղի՛ գաղան, ա՛խ, խիստ քիչերը
 Կրնան մօտենալ իրեն, ոռնայ ան.
 Այնքան քըծինքներ կը բաշխէ սակայն,
 Որ կ'ըմբընես քաջ թէ իր մէջ երկու
 Կենդանիներ կան. մէկը՝ ահարկու.
 Միւսն հեզ եւ քնքուշ. մէկը տընեցւոց՝
 Սէր, միւսն՝ օտարաց ատելութեան բոց:
 Ոչ - մեծամարմին, հովի պէս թեթեւ
 Հանքածուխի չափ մազեր ունի սեւ.
 Լանջքին վրայ եւ զոյգ թաթերուն մէջտեղ,
 Նոյնպէս ոտքերուն ծայրերը պըճեղ,
 Բիծեր կան ձերմակ. ցեղախառնութեան
 Կ'ըսեն ապացոյց. աչքերն են զընտան,
 Որոնց մէջ կըրակ կը վառի փառվառ,
 Խեռ ու քաջ բարքի խառնուրդ անըսպառ:

Երբ հաջէ, սոսկմամբ կը լեցուին օդը,
 Մօտի հաւնոցն ու հեռուի հօտը:
 Գայլերը լեռնէն կը խորհին. «Լիրը քած,
 Կըտոր մ'ոսկորի համար այդքան ցած
 Իջեցուցիր մեր ցեղին համբաւը.
 Օդնեցիր մարդոց որ իրենց դաւը
 Մեր դէմ լաւ լարեն. ու տան մ'ետեւէն,
 Հալածուած՝ սրտիդ չարհողի դեւէն,
 Ելեր կը հաջես ճաթած կոկորդով»:
 - Ի՞նչ խորհին՝ ըսեն այլք, ինքն, անվըրդով,
 Կը կատարէ իր պաշտօնն ահաւոր,
 Սատանի որդի, մութի թագաւոր:



* * *

Փոքրերն են երկու շուներ ըսկընդիկ,
Դիւրաշարժ՝ երկուքն ալ, ինչպէս սնդիկ,
Կատուէն քիչ մեծ, ճերմակ – սեւ, անպոչ,
Բրդոտ, գէր, ժըպտուն, նայուածքով դողդոջ,
Էզն է ժիժի, միւսը, արու, Սիւյիթ,
Անոր արդարեւ անբաժան Suite.

Զեմ հարցուցած ի՞նչ կու գայ մին միւսին,
Մօտ ազգակա՞ն ալ, թէ լոկ ամուսին.
Բայց աա' է ըստոյդ որ կապէկի գիծ
Կայ գէմքերնուն վրայ, խեղեփ՝ անկըսկիծ
Են անոնց նըման. յետոյքներնին փակ
Կարծես կը պահեն կըտաւով մ'անքակ:
Շողոքորթ իրենք, շատ կը սիրեն որ
Այլք ալ իրենց պէս ըլլան կեղծաւոր:
– «Աղուորիկ Սիւյիթ, աղուորիկ ժիժի»
Հսի՞ր, քըծնումով անվընաս իժի,
Երկուքն ալ կու գան կը քըսեն գէմքիդ
Իրենց թրջած սեւ քառչուէ քիթ.
Յետոյ, երբ ուզես, կը կանգնին ոտքի,
Երկիւղած, կեցած կարծես աղօթքի:

Եթէ ճըպտով մ'ոտքերնուն զարնես,
Կը ճըդէ Սիւյիթ սուտ լաց մ'աղեկէզ.
Մինչ ժիժին կուլ տայ արցունքը լըռիկ,
Ու Պլէքն, անդիէն, իր պարտքն անառիկ
Կ'ուզէ կատարել, կարեկից սրտով
Գըթութեան հաջիւն մ'անոնց զրկելով:

Եթէ պատահի կոիւ՝ չորս շուներուն
 Միջեւ, Ժիժին իր թաթիկը սիրուն
 Կ'երթայ կը դընէ էն կատաղածին
 Բերնին դէմ գելոց, ու խաղաղածին
 Պէս կըոիւն ահեղ, ա'լ ուրախութեան
 Զես կընար դընել բընաւ չափ սահման:

Կեղծաւոր կամ ոչ, շընիկներն այս զոյգ
 Այս տան կու տան միշտ զուարձութիւն ըստոյգ:
 Երկուքն ալ, ի ծնէ պարսկահըպատակ,
 Եգիպտական այս տօթ երկինքին տակ
 Կը քալեն կարօտ վարդի՝ սոխակի,
 Անոնց յուշքովն է որ, յաճախակի,
 Գորգերու վըրայ, բերուած Շիրազէն,
 Պառկած, թախծալից, կարծես կ'երազեն:
 Զորորդն է շուն մը, որ թէ ոչ քերծէ.
 Ո'չ քոթոթ, ո'չ գամբըռ, եւ որ զերծ է
 Հակառակ շունի գուեհիկ կողմերէն,
 Որ կարծես պարծանք կը սեպէ իրեն
 Խելացի չըլլալն, ու կը դաւանի
 Զինքն ենթակայ խա՛ռն դատարանի:
 Անունն է Գառլօ, թէ կ'ուզես՝ Գայլօ.
 Գայլի՝ աղուէսի դէմք այլ ընդ այլոյ.
 Բայց հասակն է բարձըր, զերդ տրիբունի,
 Հրամատարի ճիշտ կարծես տիպ ունի.
 Աչքեր՝ շողող, դունչ՝ խոնաւաթուրմ, մեծ,
 Լայն վիզ մը, կուրծքին վրայ շեղակի յեց.
 Թաթ՝ ոտք, բարձրասրուն, որովայն՝ փոր պիրկ,
 Ականջներ՝ կանդուն, պոչ մազեղ բայց դիրդ:

Գիտէ Փրանսերէն, նաեւ կը խօսի
 Մեր լեզուն, բայց ոչ՝ հայեվարն հոսի.
 Կըրթըւած է քաջ, մարմնամարզանքին
 Ուսուցիչն եղած է Միւսիւ Փիանքին.
 Երեք մէթըր բարձըր ձողի վրայէն
 Կ'ոստնու համարձակ եւ անապաւէն.
 Երբ կ'ըսես. Assis, կը նըստի խկոյն,
 Couchez` կը պառկի ըսփինքսի հանգոյն.
 Au pied` ոտքի կ'ենէ հապըշտապ.
 Pas bougez` անշարժ կը կենայ ըսթափ.
 Երբ կը կոչես. Non` չը լափեր հացը
 Զոր դըրած են, պահ մ'առաջ, դիմացը.
 Gardes` չի տար թոյլ որ առնեն մըտրակը,
 Զոր առջեւն ունի, նայուածքին տակը.
 Cherches` կը փնտըռէ պահած առարկան,
 Ուր թաքնըւած կամ փակուած ըլլայ ան.
 Հողի տակ, ծառի վրայ, սնտուկի մէջ,
 Գըրպանիւ խորը, կամ տիղմին տակ դէջ.
 Հոտը՝ ճրագ, ու քիթն ըրած առաջնորդ,
 Կը գտնէ անվրէպ, ու ծափերու յորդ
 Տարափին տակ, ետ կը բերէ հըպարտ,
 Հեւ ի հեւ, լեզուն դուրս կախած, զըւարթ:
 Իսկ եթէ պոռաս. «Գառլօ, Attaques, o'ն»
 Վիշապի պէս շուտ կը խոյանայ հո'ն,
 Զոր իրեն ըրած էիր մատնացոյց:
 Եւ մինչ իր վազքին անհաս՝ անմատոյց,
 Շընիկներն անդին կ'ողբան լալագին,
 Ինք, վէս, վեր տնկած վլնջածայլ ագին,
 Կը վերագանայ խրոխտանքով արդար,
 Գոզ կատուն վորնտած դուրս սարսափահար:

* * *

Ելնե՞նք վեր, մտնե՞նք տունը. բաւակա՞ն
Վարն ըզբաղեցանք. վե՛րն ալ բաներ կան
Նըկատողութեան իրօք արժանի.
Առաջին յարկը ունի մի քանի
Բաժանմունք, այսինքն անքրի մը աղուոր
Որու աջակողմն են՝ ակնոցաւոր
Դոներով փայտեայ եւ երեքաջէն՝
Հիւրասրահ մը մեծ, եւ անոր աջէն,
Ճաշարանն, ուսկից իսկոյն կ'անցնըւի
Ապակեայ պայծառ սենեակ մը քովի.
Չախ կողմը՝ լուացքի խուցն, ուր նստած է.
Սառնոցը, որուն քիթը միշտ բաց է.
Դիմացի գուոը աջէն կը տանի
Պատըզամ. ձախէն՝ պօղազիստանի
Մայրաքաղաքը, որուն՝ խոհանոց
Կ'ըսեն. ուր կ'այրի միշտ դըժոխքի բոց,
Եւ որուն կողմը սակայն կ'ուղղուին
Մարդկային աչքերն, առտուն, կէս օրին,
Եւ իրկունը, երբ ստամոքսին մէջէն
Որկրամոլութեան զանդերն կը հնչեն:

* * *

Անթրէին տակն է մարմար բովանդակ,
Սեւով ճերմակով գըծած կարկանդակ.
Դիմացը, ճակտին վլայ ճիշտ, կախուած է
Պատի ժամացոյց մ'որ սսկեզօծ է,



Եւ որ նուագախառըն ձայնով կ'ըսէ
Տընեցւոց, քառորդ ժամն անդամ մ'«Հո՛ս է
Զեր հանդիստին բոյնը, բայց չըլլաք ծոյլ,
Կեանքն աշխատանք է, ժիր եղէք, ո'չ թոյլ.
Ելէ՛ք կանուխ. շուտ գացէք ձեր գործին.
Վաստակներնիդ միշտ ձեզմով թո՛ղ պարծին»:

Իսկ ինձ պէս հիւրին, ա՛խ, կ'ուզէի որ
Ան կարենար տալ սանկ պատուէր մ'աղուոր.
«Ինչպէս չուտուիր միսը առանց աղի,
Նոյնպէս պէտք չէ որ տաք սէրը պաղի.
Թէպէտ սիրտերն հոս պաղիլ չեն դիտեր,
Սակայն դուն ինքդ ես միշտ քու անձիդ տէր.
Հասկըցա՞ր . . .»: — Այո՛, բայց երբ ես եկայ,
Ժամացոյց չըկար հոս, երկի՞նք վըկայ.
Այսօ՛ր էր որ ան ըսկաւ քարոզի,
Թող տըւած խըռ ձայն մը ճիշտ խորոզի:
Կից պատին վերեւ, ժամացոյցին դէմ,
Ոսկըցած գանկ մը կայ մեռելադէմ.
Լեռնայծի մը գլուխն է եղջերապերճ,
Որ կեանքի արշաւն աւարտելէ վերջ,
Հիմակ հոտ գամուեր է, եւ կը խօսի
Ատկէց, երբ առջեւը նըստած՝ խուզի
Կամ հինտի կ'ուտեն մարդիկ. — «Չափ՝ սահման
Դըրէք վայելքնուդ, օր մ'ինձի նըման
Կ'ըլլաք ամէնքդ ալ. վախճանն աշխարհին
Այս է. թո՛ղ ի զուր տեղը չը սահին
Զեր կեանքին օրերն. ի՞նչ է սէրն, ի՞նչ՝ ահ.
Առաքինութիւնն է միայն անմահ»:

Տըպաւորութեան տակ այս խոհերուն,
 Երբ գացի անդին, քայլ մը լոկ հեռուն,
 Եւ տեսայ պատին վրայ զետեղուած՝ մեծ
 Հանդերձակախան մ'անշարժ՝ լուռ՝ անհեծ,
 Ան, իր կիթառի ձեւովն, ինձ թուեցաւ
 Տաւիդ մ'որ կ'երդէր կարծես խինդ ու ցաւ.
 «Խոտի նըման է, ա՛հ, կեանքը մարդուն,
 Բարութեան մէջ լոկ փնտոէ՛ սէրը դուն.
 Ըստուերի՝ հովի պէս կ'անցնիք ասկից,
 Մե՛րն է տառապանք, վիշտ, արցունք, կոկիծ.
 Կ'ապրիս՝ թէ կրնաս թողուլ յիշատակ
 Քեզ՝ ճրագ մ'անշէջ մութ երդիքի մը տակ.
 Եթէ կրնաս որ մարդիկ քեզ յիշեն
 Մահէդ վերջ սրտով մը զըւարթ ու չէն»:
 * * *

Մօտը կայ վերի սանդուխը, բայց վեր
 Չ'ելնենք տակաւին, պէտք է տեսնենք դեռ
 Հիւրասրահն ու միւս բաժանումները,
 Կարգն յետոյ կու դայ տեսնելու վերը:
 Հիւրասրահը ճոխ է զարդարանքով,
 Չահ, գորգեր, բազմոց, աթոռ՝ քովէ քով:
 Հայելդարանին ներքին կամ վերեւ
 Ժըպտելով միմեանց կ'ուղարկեն բարեւ
 Լուսանկարներու ստուերներուն մէջէն
 Սիրելիներու դէմքերն ուրախ՝ չէն.
 Անկիւն մը, տղամարդ մ'ուշիմ եւ հըզօր

- Արոյր արձանիկ, առտընին գեղօր -
 Գիտութեան լոյսին ջահն ունի ձեռքը,
 Խաւարին կարծես կանգնած եզերքը:

Դէմն ուրիշ կոյս մը կայ, որ՝ մատնահար՝
 Ժամացոյցի դունդ մը կը ճօճէ յար.

Անդին, ըզմայլման մէջ թաղուած խորին,
 Ելեքտրադաշնակն հանդչած է լըոին.
 Մէջը կը նիրհեն մեծ հանձարներուն
 Երկնած երդերն եւ նուագները թըրթուն,
 Ծակոտկէն թուղթի գալարներու վրայ.

Սրահն յանկարծ ուժդին յոյզով կը գոռայ,
 Դըղըրդելով հետը տունն համօրէն,
 Երբ մատնահըպում մ'ըստեղնաշարէն
 Ներս կը սրսկէ շունչ մ'հողմաշարժ օդի.

Երաժշտութիւն, թո՛ղ մըրըրկոտի՛
 Ա՛խ, սիրտը քեզմով: Նըւա՛րդ եւ Արմէն,
 Առաքե՛լ, Ներսէն, իմ ցաւերս ամէն
 Գիշերուան խորքէն ի՛նչպէս տըւին խոյս
 Երբ հրայրքներուդ սուրբ կազզոյրը հոգւոյս
 Փոխանցեցիք օր մ', արթնցընելով
 Քընած ձայներու ջրվէժքն հոգեթով:
 Ա՛հ, խաղաղութիւնն, երգերէ ծընած,
 Ո՛հ, խաղաղութիւնը, նուազով սընած,
 Թո՛ղ, ծաւալի միշտ այս տան մէջ բարի,
 Իրմո՛վ թող միշտ սիրտը հոս պարարի:

* * *

Սպասներով հարուստ ամբողջ կը փայլին
Ապակեղարանքը ճաշարանին:
Զահագունտ մը մեծ, իր ճրագահոյլով
Կը սըփոէ լոյսին հետ կարծես գորով:

Մեղանն է անոյչն այն ժամադրավայր
Ուր կը խըմբըլին զաւակներն ու հայր,
Ազգական, խնամիք, ու անոյշ հոգին
Անմոռանալի անմահ մայրիկին:
Բարեկամ, օտար, կրօնաւոր, աղքատ,
Կը գտնեն հոն միշտ սէր ու սնունդ առատ:

Նահապետական չէ կարգուսարքը.
Եւրոպակենցաղ նրացած բարքը
Գործած ըլլալով իր մուտքն հոս կանուխ.
Բայց կը բուրէ թանն հոս միշտ անանուխ:
Ծոթրինն է միսին հոտն աւանդական,
Հայրենիքէն հոս անթիւ յուշեր կան.
Նոյն սիրով ամէնքը կը ճաշակեն,
Եւ կ'ըմպեն կարծես թէ նոյն բաժակէն:

Ու երբ ճայն մ'«ըզհաց մեր հանապազօր...»
Կ'աղօթէ, ինձ ցոյց կու տայ լոյս մ'հըզօր
Աղքատի՝ որբի ձեռքեր դալկացած,
Որ այս սեղանէն կ'առնուն իրենց հաց:

Չեմ տեսներ կահերն ալ, ըսպասքն ոսկի,
Աչքս անոնց վրայէն վեր կը սողոսկի



Դէպի արձանն այն, պատկեր պղնձակուռ,
Ուր մարդ մը հուժկու, հոգիով մաքուր,
Ալեկոծ նաւէն իր, ճիգով մարի
Կը նետէ գօտի ազատարարի՝
Ընկղմող մարդոց: — Այս տունի տիրոջ
Պատկերը չէ դէմքն այդ սիրաբողբոջ.
Դժբախտութեան ծովն ընկղմածներուն,
Որոնք հոս քու քովդ եղան կամ հեռուն,
Քանի՞ անգամներ դուն երկարեցիր
Ազատարարի ձեռքեր կենսաձիր:
Արժէք չունին մեր աղօթքն ու օրհնէնք.
Թո՛ղ այդ արձանն իր խորհուրդովն աննենդ
Սրբէ այս սեղանն, երկնային հացին
Խառնելով անոր օրհնութիւնն անգին:

* * *

Ապակեսենեակն եկէք ինձ հետ արդ.
Կը տեսնէ՞ք ո՞րքան պայծառ է եւ զուարժ
Ներսն ու զուրսն իրար կը դիտեն հոն միշտ,
Զերդ բարեկամներ անտրտում անվիշտ:

Ահա շըմինէն, օճախն հայրենի,
Շապիկ եւ փողկապ հաղած քաղքենի:
Երբ փըչէ ձըմրան բուք եւ փոթորիկ,
Առջին կը շըրեն մինտէր աթոռիկ,
Ու մինչ ծըխնելոյզը կը քաշէ վեր՝
Կը բակին ծուխն եւ ածխածին կազեր,
Կայծուտ մոխիրին մէջ կը խորովեն

Շագանակ խազուած եւ մըսրացորեն:
Ու այսպէս կ'անցնի անձիւն ձըմեռը,
Կազդուրելով ողջն ու կիսամեռը:
Քիչ մը կրակ ներսէն, դուրսէն քիչ մ'արեւ
Կը զուարթացընեն հոս կեանքն արդարեւ:

Կաթ կու տայ կատուն փոքրիկ ձագերուն,
Շընիկները խաղ կը սարքեն սիրուն.
Նարկիլէն, անկիւն մը բազմած, կու լայ
Իր գլխուն ինկած կըրակին վըրայ.
Տապեղ, տոմինօ, ըսքանպիլ, խաղթուղթ,
Սուրճ, թէյ եւ թըմքի, կամ տուղտի մըդպուխտ,
Կը գրաւեն ժամեր: Հեռաձայն յաճախ
Կու գայ խանգարել ժամանցն այս ուրախ.

Մենուֆիէ, Սոհակ, Մելլավի: Երբ ութ
Կը հընչէ ժամը, Հայրիկն «Ասիութ»
Կ'ուզէ անձկագին. ա'խ, տեսնե՛ս, ի'նչպէս
Կը թրթուայ ձայնը, երբ կ'ըսէ. «Ներսէս,
Արմէն, ի՞նչպէս էք, ինչո՞ւ պատասխան
Չը գրեցիք գիրիս. իմ գիրիս փոխան
Ես՝ ալ չեմ առած գիր. ա'խ, տէրտըս մի'
Նորոգէք նորէն. հոգիս չը տրտմի':

Անցնինք. ինն է ժամը, եւ ուստիօն
Ահա կը փըռէ իր ձագարը, հոն:
Շատո՞նց վերջացած է ալաթուրքան.
Վիշննա, Մոսկուա Պոլսէ վերջ կու դան
Մեզ լըսեցընել իրենց երգերը...

Նորէն կը բացուին սրտիս վէրքերը.
Ինչո՞ւ կարինէն, Սըլվազէն, Վանէն,
Չը լըսէինք ձայն մ'երդ մ'ալ հայերէն:

Զորնա՛ս, ջնջըւիս, անէծքի ծընունդ,
Այրըւի՛, վերնա՛յ աշխարհքէս անունդ.
Յեղ չար, իժերո՞ւ բոյն, հըրէ՛շ գազան,
Որ խողիսողեցիր ազգ մ'անպարտ, դաժան
Ծըրագիրներուդ իրագործումին
Չոհելով անոր հոգին եւ մարմին.
Բայց ինչո՞ւ հոգին... ո'չ, ո'չ, կընաս դուն
Կորզել մեր երկիրն, դարաւոր մեր տունն,
Անզօր սակայն միշտ պիտի մընան քու
Հարուածներդ մեր հոգւոյն համնելու:

Ան, ա՛խ, այդ հոգին, պիտի ապրի յար
Մեր պատմութեան մէջ, իրբեւ միչն արդար
Դատի մը, խրախո՞յս յաւիտենական
Մեր սրտին, քեզի ալ՝ վրէ՛ժ անվախճան.
Քու ցաւի նուազներդ ու սեղեխ կեանքիդ
Թո՛ղ ձայներն հնչեն... ե՛մ ես աներկմիտ
Թէ չը կորսըւիր բնաւ արդարութեան
Չայնը՝ ան հնչէ պիտի յաւիտեան:
Պիտի լըսէ զայն Անմահն երկինքէն,
Ու քու արիւնուշտ հոգւոյն ոխն ու քէն
Պիտի պատժըւին, պիտի վընանա՛ս
Ո՛րքան ալ տքնիս, ո'րքան ալ ջանաս:
Պիտի գերեզման, ա'խ, ըզքեզ տանի
Ծոցէդ հուսկ ծընած ոճիր մ'ընտանի:

Եթէ բնութիւնն իր ունի օրէնքն որ
 Հէք՝ տըխեղծ ձայներ, այսքան հեռաւոր
 Ափերէ հնչուած, լըսուին մինչեւ աստ,
 Կա՛յ անշուշտ օրէնք մ'հրզօր՝ գերիմաստ,
 Որ խըղդուած խըղճին խըղուըրտիւնն է՛ն խուլ,
 Հծծիւններն, ելած հիւղերէն խարխուլ,
 Բարձրանան մինչեւ ունկնը Անեղին:

Դրօ՛շ դժբախտ, կարմիր – կապոյտ ու դեղին,
 Որուն՝ մեր խոց յոյսը պահ մ'յառեցաւ,
 Մէջըդ պարուրէ, մեր հաւատքն եւ ցաւ.
 Մե՛րն ես, մեզի՛ պէտք է օր մը, նորէն
 Դարձընես զանոնք, երբ Ազգն համօրէն
 Պահանջէ քեզի յանձնածն այդ աւանդ,
 Փանձն իր կեանքին, իր հոգւոյն մանաւանդ:

Ապակեսենեակն ինծի կ'երեւի
 Սուրբ վայր մը հիմա. գըլխուս վերեւի
 Զահն հնդաստեղեան՝ անոր տաճարի
 Շուրքն է հագցուցեր. մէկ մէկ կամարի
 Կը նմանին ահա նեղ ամբարձածիդ
 Սա պատուհաններն, իրենց թափանցիկ
 Երկնագոյն շղարշէ վարագոյրներով,
 Որ կազմեր են հոն ամպեղէն մի ծով:
 Դուրսի բարձր ու լայն Բուսիանիս ծառն
 Որ արիւն ու բոց կը հազնի ամառն,
 Երփնապակիի պատկեր մ'է ահա,
 Լուսամուտներու բիւրեղին վըրայ:

Անկէ՛զ մորենի, ո՛չ, Ազգիս Հայոց
 Ան կը նըկարէ ցաւերուն հընոց:
 Իր բոցին շառայլը ծաթեր է ներս,
 Կը նշմարեն զայն տամկացած աչերս,
 Դարբինի արոյր արձանիկին վրայ,
 Որ շըմինէին վրայ կը բարձրանայ:

Բոնկած բայց չ'այրող ծառը, հոն կանգուն,
 Սալին վրայ հակած այս կտրիճն անքուն,
 Խորհրդանըշանքը չե՞ն մեր ցեղին:
 Մոսկուա՛, Ըստամպուլ, արեան հեղեղին
 Դահիճներն այդ զոյդ, թող երգեն, պարեն,
 Նայուածքնին կուրցած արեան շըպարէն:

Դուն, քաջ եւ արի Ազգ իմ սիրական,
 Թո՛ղ, թո՛ղ վիշտիդ լացը՝ կոծն ու կական,
 Ճակատագիրիդ սալին վրայ հակած,
 Հաւատքով, սիրով, յոյսով անկասկած
 Պինդ աշխատանքով եւ վստահութեամբ
 Կոփէ՛ քու բախտը. ու դուն, տըխո՛ւր ամպ,
 Որ մեր աչքերէն, զերդ ափ մը փոշի,
 Ծածկեցիր երբեմն երկինքը յոյսի,
 Հեռացի՛ր այլ եւս, որ դարձեալ տեսնենք
 Հայրենիքին աստղը անոյշ՝ աննենդ:

* * *

Ժամէն դուրս կ'ելնենք, ու քովի բակը,
 – Պատըշգամին լայն հըրապարակը,

Որ նախշուն - յատակ գաւիթ մ'է երկայն -
 կը կենանք անշարժ, ու կը դիտենք զայն:
 Հիւսիս արեւմուտքը հիւրասրահին
 Ճեմելավայր մ'է, բազրիքով առջին.
 Զեղունն է փայտեայ, բարձր ու դուրս հակած
 Յըւիքով մը լայն, որուն վրայ՝ փակած
 Են ճենողկոյզի մը ճիւղքը դալար,
 Տան մէջքին կանանչ մետաքսէ կամար:
 Ամրան արեւին, հովանոց մ'է ան.
 Աշնան թօներուն դէմ՝ պատըսպարան:
 Երբ գարնան զեփիւոը մեղմիկ փըչէ,
 Զմրան, երբ քամին ոռնածայն ճըչէ,
 Հոս, այս բացօթեայ սրահին մէջ է որ
 Կը ճանչնաս բնութիւնն ահեղ կամ աղուոր:
 Ամառուան պարզկայ գիշերները զով,
 Ծառերուն մէջէն լուսինն երբ նազով,
 Զերդ կոյս ամօթղած, իր չողքն արծաթէ
 Զմրուխտ կըտուրին վրայ հոս կը ծաթէ.
 Մինչ գորտերն հեռուն իրենց կոկոցով
 Կը լեցնեն ճահիճն ու տղմալից ծով,
 Ծղրիթն ու ճիճին, չ'իտես ո՛ր խոտին
 Կպզած, գիշերուան էն անոյշ օդին,
 Մինչ իրենց անխոնջ երդը կը ճըզզան,
 Եկուր, եկուր հոս, հողերդ այլազան
 Մոռցած, պահ մ'եկուր հոս, եւ դի՛ր հոգիդ
 Աստղերուն աչքին տակ վառ անքըթիթ.
 Մակայն բե՛ր այստեղ սիրտըդ վըշտարեկ
 Մայիսի օդերն, յաւէտ քան երբեք,

Երբ ցախսարեկներն ու ճընճղուկները
 Հարիւրներով հոս կը խմբէ սէրը:
 Տե՛ս դըանդիին վրայ, գերանի մ'ետին,
 Կեցած է մարին, որ չ'իյնայ գետին
 Աղածրի ձագուկը նորափետուր.
 Ա՛խ, ի՛նչպէս անոր կ'ըլլայ ձայնատուր՝
 Հնելու իր թոփչքն առաջին անվախ.
 Ինչպէս կը փայլին աչուկներն ուրախ
 Քիչ մ'անդին կեցած է վարուժանը,
 Պահապան՝ դիմացն ըսպասող շանը:
 Ուրիշ մը, կտուցին՝ ծըւէն մը բուրդի,
 Ճիւղին վրայ, սիրտը սիրով կը յորդի
 Մինչ արուն, դէմը, վերի անկիւնը,
 Շիւղերով պատին կը հիւսէ բոյնը:
 Տերեւակոյտի մը մէջ կ'երեւի
 Գըլուխ մը, խառնուրդ ճերմակի սեւի.
 Թխսամայր մըն է, որ ձուերուն վրայ
 Գիշեր եւ ցերեկ անքուն կը դողայ.

Թոչնաքաղաք մը կայ երկնադաւառ
 Այս ճեղունիս տակ կանաչակամար
 Ամէն դի շարժում, ամէն կողմ բոյներ,
 Երդ ու ճըւճըւանք միջոցն են բոներ:

Ո՛վ վարձակալները բարի՝ այս տան,
 Որ չ'ունիք ոչ մէկ պատճառ տրտմութեան.
 Որ չէք հերկեր, ո՛չ ալ կը հնձէք բնաւ,
 Ու շտեմարաններ ունիք միշտ անբաւ,

Որ չէք մաներ բնաւ, ո՛չ ալ կ'արդուկէք,
Ու նոյն ինքն անբիծ գեղեցկութիւնն էք,
Չենք ուզեր ձենէ վարձք բընակութեան.
Չմրուխտ յարկն այս ձերն ըլլայ յաւիտեան.

Մեզի՝ ալ տուէք, միայն, երջանկութիւնը,
Որով միշտ այսպէս լի է ձեր տունը:

* * *

Երկրորդ յարկն ունի բաժանմունք եօթը,
Հինգը ննջարան, միւսն իրենց յօդը.
Լուսարան եւայլն: — Անկիւնինն է լայն
Քան մէկալները, ինչպէս եւ երկայն:
Շիք պահարաններ ըզգեստի՝ լաթի,
Հայելադարանք, գզրոցներ, բադի
Կըտուցի գոյնով. ըզգեստակախան
Մը փայտէ. կազմովը՝ ծառանըման:
Սիպտակ մետաղէ դարգիճ մ'որ ունի
Մըժղարգել եւ ինչ որ հանդիստ քունի
Պայմանք են. բարձեր, անկողին վերմակ,
Ամէնքն ալ մաքուր, ձիւնի պէս ճերմակ:
Կախուած է սնարին քով ձայնախօսը,
Ինչպէս գըրպանին վրայ ինքնահոսը.
Անոտքին քով կայ բազմոց մը սէտիր,
Անդին, հայլիի մ'առջեւ փոքրադիր,
Ժամացոյց մ'աղուոր, որ մարմարեռնէ
Մարմինի մը մէջ կը պահարանէ
Ելեքտրամըթերք մ'երկամեայ պաշար՝
Ժամանակացոյց շարժման ինքնալար:

Ուրիշ հայլիի մը առջեւ, քովը,
Ուր մերթ կը փըչ բաց դուռին հովը,
Շարուած են մեծ փոքրը դեղի շիշեր,
— Ամէնքն անունով այս տեղ չեմ յիշեր —
Անոնց մէջ կան Փրուդ սօլդ եւ քինին,
Զոր կ'առնեն մարդիկ երբ կ'ապաքինին.
Ինչպէս նաեւ պիքարպօնադ տը սուտ,
Եւ վիլլա քապրան, թընդանօթ անսուտ:

Մօտը, պատէն կախ, գործիք մ'եւըս կար,
Ելեքտրամըթիչ մարձումի համար.
Մըճեփոց մըն ալ, փայլուն մետաղէ,
Հզգո՞յշ, մի՛ դպչիր, ձեռքըդ կը տաղէ:
Ելեքտրաճարմանդ մը, բարձին տակէն.
Կը վառէ ջահը, կախ՝ առաստաղէն:

Միւս չորս սենեակներն աւելի փոքր են
Համեմատաբար՝ մէկը մէկալէն:
Ամէն մէկն ունի դարգիճ, զոյդ կամ մի,
Դեղին մետաղէ, որ ժանդուումի
Զէ բնաւ ընդունակ. հայելի, դարան,
Հսպասներ պէսպէս, գըզրոց, պահարան:

* * *

Վարի յարկն էր վայր գործի՝ զբօսանքի,
Մա՝ հանդիստի, քնոյ եւ երազանքի:
Կէս գիշերէ ժամ մ'առաջ կամ ետքը,
Յաճախ աւելի կանուխ, երբ հետքը

Զէ մնացած ա'լ ոչ մէկ շըշընկոցի,
 Բացի հեռաւոր խուլ ողբուկոծի
 Հծծիւններէն, զոր ծղրիթն ու գորտը,
 - Անբաններուն է'ն դատարկապորտը -
 Գիտեն կըցկըցել գիշերուան մէջ լուռ,
 Քնացողներու իբր օրօրերդ տըխուր,
 Ամէնքը կու դան, խոնջ, քայլամոլոր,
 Ամոքել օրուան տաժանքնին բոլոր:
 Անխըլիրտ քունին ընկըզմած ծոցը,
 Անոր մէջ մարել հոգերուն բոցը:

Կը քնանան ամէնքը մեղմիկ հեւքով.
 Բաց պատուհանէն մինչ գլխընուն քով
 Կը շնչէ զեփիւռն անոյշ՝ գիշերուան,
 Անմեղ սիրտերու հեզիկ պահապան.
 Մինչ զստացաւէս անքուն՝ ասդին ես,
 Անողորմ բախտէս պատժըւած կարծես,
 Կը տապկըւիմ մէջը տապի տօթի,
 Քրտնաթոր, նըւաղ, բայց ոչ անօթի:
 Ու կ'երազեմ, աչքըս մութին մէջ բաց,
 Ինչ որ կ'երազեն միւսները, քընած:

Տանուտէրն արգոյ կը տեսնէ վերին
 Եղիպտոսն ամբողջ արթէզեան ջրհորին
 Ալիքներուն ծովը դիաթաւալ,
 Յուութի՝ կանանչցած մարդ ծովածաւալ.
 Ու Սահարայի անապատներէն
 Պատուիրակութիւն մը եկած իրեն,
 Կը խնդրէ իրմէ յոյժ թախանձահայց,

Աստուծոյ սիրոյն, հեղ մ'իրենց տալ այց.
 Ու Մովսիսական սուրբ գաւազանով,
 Բըղիւեցնել հո'ն ալ ալիքներու ծով:
 - Զ'ունիմ ես գործիք ու մարդ բաւական.
 Ծաղկեցնելու աւազան մ'այդքան

Մէծ, կ'ըսէ անոնց տանուտէրն ազնիւ.
 Ունեցածս ամբողջ կը բաւեն հազիւ
 Իմ հոս ըսկըսած տասնեակ հորերուս,
 Զը տոկար այդ ծանըր լուծին մեր ուս:

Կը կրկնեն անոնք. - Կը հաւատանք որ
 Ողորմածն Աստուած գործն այս փառաւոր
 Պիտի կատարէ քու ձեռքով միայն,
 Բնդունէ՛ թէ իր սուրբ հրամանն է այն:

Կը ժպտի քունին մէջ տանուտէրը.
 Ու երբ կը բանայ նա իր աչքերը.
 Կը տեսնէ դիմացը նստած Գարլօն,
 Որ փընչագեղ պոչը կը շարժէ հոն:

* * *

Ն Ա Մ Ա Կ Ա .

Արմէն Տուտուին, Ներսէս պապային,
Կը դրկենք նըւէր, ոչ փէքմէզ - դային,
Այլ պարպռնեայի իւղոտ թավային
Համեղաճաշակ բերքը ծովային:

Կը դրկենք նաեւ աւասիկ մէկտեղ
Ո՛չ բողկ, ո՛չ պըրաս եւ կամ ճակընդեղ,
Ո՛չ լապտերի մոմ, եւ ո՛չ ալ կանթեղ,
Որոնցմէ այնքան առատ կան այնտեղ.
Այլ քիչ մը բըրինձ եւ որթի տերեւ,
Մեր այս պարտէզէն հանապազարեւ.
Իրենց ընծայուած ողջոյն եւ բարեւ
Ու մեր մեծ սիրոյն շընորհն ակներեւ:

Բրինձին մէջ դըրէ՛ք աղ, մաղտանոս, սոխ
Եթէ կը կամիք, քիչ մըն ալ ազոխ.
Անոր վրայ ծածկած փոշիոտն այն ցօղ
Լըւալէ վերջը ջուրին մէջ վազող:

Յետոյ փաթթեցէք մէջը տերեւին,
Վաղ առտու, կանուխ լոյսովն արեւին,
Բրինձի այս խիւսէն. բայց ամենեւին
Պէտք չէ մէջիններն դուրսէն երեւին:

Երբ սանին մէջէն բըզզայ. «Եղեր եմ»
Եափրախով տօլման, ա՛խ, հոտը սիրեմ,
Իսկոյն կը ջարդէք սալադան փըրփեմ,

Վըրան՝ ձէթ, լեմոն, բայց ի՞նչ, ցնդեր եմ,
Մընացածն ալ ո՞վ չը գիտեր միթէ,
Հաց, կամ պաքսիմատ, լաւաշ կամ փիտէ.
Ո՛րը որ կ'ուզես. ա՛լ սիրտըդ գիտէ,
Ու քիչ վերջ կը զդաս թէ փորըդ կուշտ է:

Բայց պէտք է ձեզի խըրատ մը տամ դեռ.
Տօլման ու ձուկը խառըն չեն ուտեր.
Չեն դըներ մէկը միւսին առընթեր.
Զատ համ, հոտ ունին, եւ զատ ունին դեր:
Թէ մէկտեղ ուտէք, ներսը մեծ կըսիւ
Կ'ըլլայ, զի մէկն է կըրակ, միւսը խոփիւ.
Սուզանաւ է ձուկը խայտախարիւ,
Տօլման զրահաւոր, մէջը՝ զօրք լըրիւ:

Պատասխան չ'առի գըրած նամակիս.
Եղա՞ւ ասիկա . կարծես քամակիս
Մէջտեղին զարկաւ ձեր լըռութիւնը,
Հոն շաչելով իր անխօս թընդիւնը:

Այս ինծի ա'յնքան մեծ հոգ եղաւ որ,
Միշտ կը մըտածեմ, ո՞վ է մեղաւոր.
Ե՞ս որ տօլմային ու ձուկին փառքը
Երգեցի սրտանց, թէ շոգեկառքը,
Որ չ'ունեցաւ ոտք՝ ոտանաւորիս
Ճուղապ բերելու: Արդեօք, ծոմ՝ փէհրի՞զ
Պահած էիք դուք, կամ կը պահէք դեռ,
Որ չը կրցաք ձեր գլխուն ըլլալ տէր:
Բայց հընա՞ր է որ ձուկին, տօլմային,
- Որոնց դեւերն իսկ, կ'ըսեն, կ'ըզմայլին -
Դիմացը նստի մարդը ծունկ - բարեւ,
Կամ շուրջը դառնայ զերդ լուսին - արեւ,
Առանց յարձակում գործելու վրանին,
Կարծես խիստ կղպանք գըրած բերանին.
Եւ կամ արդեօք դուք վշտացա՞ք սաստիկ,
Ու սեպեցիք դիրս օդով ուռած տիկ.
Վասնզի, ա'խ, չէր կրցած յիշել ան
Սմբուկն ու լոլիկ ու թարմ ֆասուլեան,
Որոնք պառւին մէջ եղբայրաբար
Նըստած էին քով քովի անբարբառ:
Է՛հ, կրնայ ըլլալ՝ այնքան տափակցած
Է աշխարհ հիմակ, վեր վար, բարձր ու ցած՝

Մարդոց եւ իրաց մէջ այնքան քիչ կայ,
Որ սոխն ու սխտորն ու կաղնին հսկայ
Մեզի պէս ունին ըզգացում պատուոյ,
Կ'առնըւին, եթէ մոռնանք զիրենք, ո՛հ,
Կամ պէտք է որ մենք իրենց փոխարէն
Ցաւինք կամ հրճուինք բարեկամօրէն:
Մերթ գոմ է սիրտը մարդուն, մերթ պոստան,
Հստէպ կը բուսնի հոն խոտ. կը վխտան
Անոր մէջ յաճախ սողուն եւ կապիկ,
Մարդու ձեւ հագած, կամ կընոջ շապիկ:
Կամ արդեօք ցաւցի՞ք որ մեր նամակին
Մէջ չէինք յիշած թէնձիրէն անգին,
Պըղինձ խարախով - մզկիթի գմբէթ -
Համարելով զայն առարկայ անպէտ,
Ու թապախները, ձիւն ճերմակ մաքուր,
Որ զիրար գրկած էին ամբակուռ,
Մէկը՝ տակը, վրան՝ միւսն, իրենց ծոցը
Առած աղամանն ու պղպեղնոցը:

Բայց ինչո՞ւ ասանկ փուճ խնդիրներով
Երեսնուդ փըչենք խիստ բառերու հով.
Պատասխանէս վա՛զ անցանք, վէսսէլամ,
Հերիք՝ որ անոր համար այդչափ լամ:
Ուրիշ հարց մ'ունիմ, անոր՝ գէթ շուտով
Ճուղապ մը պէտք է տաք հանդարտ սրտով.
Ո՞ւր մընաց հիմակ այն վեհ թէնձիրէն.
Չ'ըլլա՛յ բաց թողած ըլլաք փէնձիրէն.
Ու մութին մէջէն երկնցած ձեռքեր
Գող կիրքերու զայն ըրած ըլլան կեր.

Պառւն ինչո՞ւ ետ չը բերաւ զանի.
 Խոհանոցին փառքն էր աւագանի՝
 Այդ պատկառելի սանն այստեղ մեր տան.
 Իրմով արդ արդեօք որո՞նք կը խայտան:
 Խնդիր չէ որ հոս ըլլայ ան կամ հոտ.
 Մերն ու ձեր չըկայ. մէկ տուն ենք մէկ հօտ.
 Ես ձեր հովիւր, դուք գառներս անոյշ,
 Ես ծառը ծըռած, դուք ծաղիկ քնքուշ:
 Ինչ որ ձերն է՝ իմս է, իմս ալ՝ ձերին.
 Սէրն է սընունդը մանկան ու ծերին:
 Ա՛խ, ապրեցէք դուք, ձագուկներ բարի,
 Ազնիւ զաւակներ ծնողքներու արի:

Բսելիքս այս չէր հիմակ հոս սակայն.
 Թէնձիրէն ո՞ւր է. քարոզ տալով՝ զայն
 Չը մոռնանք յանկարծ. ո՞ւր է, ո՞ւր, ըսէ՛ք,
 Ո՞ւր կը գըտնըւի, ա՛խ, թէնձիրէն հէք.
 Երկու վախ ունիմ. մէկն արդէն ըսի,
 Չ'ըլլայ զայն տարած ըլլան մեկուսի:
 Միւսն - աւելի գէշ. աղետալի բան -
 Չը կրցայ խորհիլ ես զայն ի սկզբան.
 Բայց ահա սրտիս մէջը կը կաթէ
 Անոր ծանր ու սուր կասկածն երկաթէ:
 Տըղաք, չըլլայ որ ձուկին, տօլմային
 Գինովցած՝ համէն, հոտէն երկնային,
 Սանն ու կափարիչն ալ մէկտեղ ծամած
 Ու կերած ըլլաք, իբրեւ քըթըռ հաց:

Գողցըւածն հընար է գտնել նորէն.
 Կերածին տեղը չի դար փոխարէն.
 Կերէ՛ք, ինչ որ շահ կը ծընի գործէն.
 Սուր ատամներնիդ չ'ըլլայ որ փորձեն
 Լըզելէ վերջը վաստակին աղը,
 Դրամագըլուխին կրծել մետաղը:

Զուկին, տօլմային առասպելական
 Վէպէն հանուած այս խըրատս հայրական
 Ականջնուդ ըլլայ օդ, գոհար, ոսկի,
 Շինուած արուեստով միտքի եւ խօսքի:



Tip. Armena, S. Lazzaro - Venezia
il 2 Dicembre 1939 - XVIII



ՀՀ Ազգային գրադարան

31571

970